

Roemeens

Van Wikipedia

Dit artikel is gesjreve (of begós) in 't Mestreechs. Laes hie wie v'r mit de versjillende saorte Limburgs ómgaon.

't **Roemeens** is 'n Oos-Roemaanse taol die in Roemenië en Moldavië door de mierderheid vaan de bevolking gesproke weurt. Allewel in Moldavië meistal vaan "Moldavisch" gesproke weurt, geit 't hei dudelek um dezelfde taol. Wijer weure zuideleker op de Balkan nog dialekte gesproke die hiel kort bij 't Roemeens stoon; zuug ouch Aroemeens. Alles bijein zien 'rs oongeveer 28 miljoen minse mèt Roemeens es ierste taol.

Klaanklier, grammair en vocabulair

't Roemeens huurt, wie gezag, mèt 't Italiaans, tot de Oos-Roemaanse taolgroep, dat wèlt zègke tot 't miervoud de oetgange *-i* en *-e* gebroek, neet *-os* en *-as*. 't Roemeens kint versjeie diftonge, die oontstoon zien oet breking vaan lang monoftonge (*ea*, *oa*). De *-i* is de afgeloupe iewe vervalte.

't Roemeens is de einege Roemaanse taol die nog get vaan 't Latiense naomvellesysteem euvergehawwe heet: vruiwleke wäörd höbbe in 't inkelvoud ein vörm veur de nominatief/accusatief en ein veur de genitief/datief. De meiste Latiense oonzijege wäörd zien in 't Roemeens mennelek in 't inkelvoud en vrouwelek in 't miervoud; Roemeense grammatica's spreke dèks vaan *ambigen* (twieslechteg) veur *neutru* (oonzjeg). Wie 't Italiaans heet 't Roemeens drei vaan de veer conjugaties vaan verbe bewoerd.

't Vocabulair vaan 't Roemeens versjèlt vaan de aander Roemaanse taole umtot vāöl Slavische wäörd drinzitte, die via de Slavische naobere, meh veural door 't Kèrkslavisch drin gekoume zie. Wijer heet 't ouch Törkse (oet d'n tied vaan de Törkse euverhiersing) en Griekse wäörd.

Extern linke

- Wikipedia op 't Roemeens (<https://ro.wikipedia.org/>)
 - EasyRomanian (<http://www.easyromanian.com/>) (Ingelstaolege cursus Roemeens)
-

Aafkomstig van Wikipedia, de Vriej Encyclopedie. "<https://li.wikipedia.org/w/index.php?title=Roemeens&oldid=408245>"

Dees pazjena is 't lèts verangerd op 25 aug 2016, 21:15.

De teks is besjikbaar ónger de Creative Commons Naomsvermelding/Geliek Deile licentie. 't Is mäögelik dat aanvöllende veurwaarde van toepassing zeen. Betrach de Algemein veurwaarde veur mie informatie.